



# Izbor zdravstvene njege Östergötland – odaberite svoj zdravstveni centar

## U skladu sa Vašim potrebama

Kao korisnik Izboru zdravstvene njege Östergötland slobodni ste odabrati zdravstveni centar koji vam najbolje odgovara pod uslovom da ste registrirani u okrugu Östergötland. Odabir možete napraviti u skladu sa svojim potrebama i željama.

Uvijek ćete dobiti zdravstveni centar koji odaberete, a ako niste zadovoljni možete preći u drugi centar.

## Fokusiranje na pacijenta

Kao rezultat izbora zdravstvene njege, zdravstveni centri se međusobno natječu za pacijente, tako da prilagođavanje potrebama pacijenata dodatno dobija na značaju. Neki zdravstveni centri mogu, na primjer, produžiti radno vrijeme kako bi poboljšali svoju dostupnost.

## Kako odabrati

Uvijek trebate imati stalni zdravstveni centar koji je Vaša prva stanica u slučaju da Vam zatreba zdravstvena njega. Tu ćete naći ljekare, medicinske sestre i okružne medicinske sestre, kao i zdravstvene usluge koje mogu zatrebati Vama i Vašoj porodici, na primjer kliničke usluge za djecu, kućnu njegu i fizioterapiju.

Ako ste zadovoljni svojim trenutnim zdravstvenim centrom, možete nastaviti koristiti njegove usluge i ne morate ništa učiniti. Ako želite promijeniti zdravstveni centar, najjednostavniji način za to je da posjetite web lokaciju okružnog vijeća na adresi [www.lio.se](http://www.lio.se).

Odabrati možete i pismenim putem tako da popunite obrazac za izbor zdravstvene njege. Zdravstvene centre možete mijenjati po vlastitom nahođenju, a u roku od dva mjeseca bit ćete registrirani u novom zdravstvenom centru.

Okružno vijeće dodjeljuje novčana sredstva zdravstvenim centrima za svakog registriranog pacijenta. Ako promijenite zdravstveni centar, dodijeljeni iznos će biti isti i u Vašem novom zdravstvenom centru.

Kao pacijent plaćate istu naknadu za pacijenta u svakom od zdravstvenih centara uključenih u Izbor zdravstvene njege Östergötland. Propisi vezani za maksimalnu cijenu recepata za lijekove i besplatne recepte isti su u svim zdravstvenim centrima.

## Informacije o zdravstvenim centrima

Možda želite saznati više o zdravstvenim centrima kako biste lakše mogli odabrati i uporediti. Na web lokaciji okružnog vijeća, u adresaru vijeća i u magazinu Hälsotecken koji se isporučuje u sva domaćinstva, možete pronaći informacije na švedskom jeziku vezano za radno vrijeme, zakazivanje pregleda, komentare pacijenata i koliko vremena je potrebno za uspostavljanje kontakta telefonom.

## Ovlašteni zdravstveni centri

Svi zdravstveni centri u Izboru zdravstvene njege Östergötland posjeduju ovlaštenja okružnog vijeća okruga Östergötland. To znači da su svi centri pristali da pružaju istu primarnu zdravstvenu zaštitu i medicinsku njegu uključujući, na primjer, savjetovanje, fizikalnu i radnu terapiju, kliničke usluge za djecu i novorođenčad, preventivnu zdravstvenu zaštitu, kućnu njegu i zaštitu mentalnog zdravlja. Osim pomenutih, zdravstveni centri mogu slobodno proširivati obim svojih usluga, prilagođavajući na taj način njegu potrebama pacijenata.

## Kvalitativni zahtjevi

Okružno vijeće vrši redovne analize rada zdravstvenih centara kako bi osiguralo da sve funkcioniše kako je predviđeno. Ako zdravstveni centar ne udovoljava standardima, vijeće mu može oduzeti status ovlaštenog zdravstvenog centra. Okružno vijeće ima odgovornost da osigura da svi građani imaju pristup zdravstvenim centrima u svojim općinama.

## Želite saznati više ili vam treba obrazac za izbor zdravstvene njege?

Za više informacija obratite se svom zdravstvenom centru ili posjetite stranicu [www.lio.se/vardval](http://www.lio.se/vardval). Obrazac za izbor zdravstvene njege možete preuzeti u nekom od zdravstvenih centara ili naručiti na brojeve telefona 010-103 02 19 i 010-103 02 24. Ako promijenite svoj zdravstveni centar obavijestite o tome okružno vijeće putem njegove web lokacije.

Här kan man skriva in text...